

Dann sie sunst anders essen nüt
Dann narren fleisch zu aller zyt
Vnd drincken blüt für irn wyn
So würt der narren herberg syn/
Homerus hatt diß als erdacht
So mit man hett vff wißheyt acht
Vnd sich nit wogt lycht vff das mer
Hie mit lobt er Vlysses ser
Der wise rät gab / vnd güt anschlag
Die wise man streit vnd vor Troy lag!
Vnd wie der zehen jor dar noch
Mit grossen glück durch all mer zoch!
So Cyrce mit ir dranckes gewalt
Syn gesellen kert inn thieres gstat
So was Vlysses also wiß
Das er nit nam dranck oder spiß
Biß er das falsch wib über böst
Vnd syn gesellen all erlöst
Mit eym krot das man moly heist
Also halff im vff mancher nott
Sin wißheyt / vnd vernünfftig rott
Die wise er aber ye wolt faren
Mocht er die leng sich nit bewaren
Im kem zu letst eyn wyder wynd
Der im syn schiff zerfürt geschwynd
Das im syn gesellen all erdrincken
All ruder / schiff / sägel / versyncken
Syn wißheyt im zu hülff doch kam
Das er alleyn / vff nacktet schwamm
Vnd wust von vil vnglück zu sagen
Wart doch von sym sun dot geschlagē

